

**ATASSUT****UPA 2017/51****Mala Høy Kúko****04. 05. 2017**

Naalakkersuisooqatigiit isumaqatigiissutaat naapertorlugu Kujataani Itilliaruup N 60.614 W45.46.622 ikerasaliorneqarnissaanik Naalakkersuisut suliniuteqarnissaanik peqquneqassasut Inatsisartut aalajangiiffissaattut siunnersuut.
(Inatsisartunut ilaasorta Kelly Berthelsen, Inuit Ataqatigiit)

Naalakkersuisooqatigiit isumaqatigiissutaat naapertorlugu Kujataani Itilliaruup ikerasaliorneqarnissaanik Naalakkersuisut suliniuteqarnissaanik peqquneqassasut Inatsisartut aalajangiiffissaattut siunnersuut ATASSUT-minngaaniit imatut taperserlugu oqaaseqarfigissavarput.

Siullertut nuannaarutigaarput una siunnersuut sammeneqaqqilermat, tassami ukioq 2014 ukiakkut Inatsisartuni ATASSUT-miit Inatsisartunut tassunga tunngasumik aamma siunnersuuteqarnikuuvut.

Tunngavilersuutitsinniippoq nunaqaratta isorartooruarmik aammalu peqqarniissinnaasaqisumik, pingaartumik immikkut isiginiassagaanni sumiiffiit najugaqarfiusut akornanni imaatigut angallanneq.

ATASSUT-miit isumaqarpugut pissusissamisorluinnassasoq sumiiffiit ilaasa, matumanilu Kujataani Itilliaruup nalaa aamma taperserlugu imaatigut atanilerneqarsinnaanissaat siunertarlugu ikerasaliorniarluni qaartiterneqarsinnaasut misissuiffigineqarnissaat.

Tassunga tunngatillugu ATASSUT-miit sumiiffiit pingasut, matumani pineqartoq ilanngullugu aallarniutitut suliniuteqarfissatut piukkussagut immikkut tikkuassavavut.

Egalugaarsuit kujatinnguani sipisassatut piukkussarput (60:37' 35,92N / 45:46' 42,80V), aammalu taperserlugu uani siunnersuummi pineqartoq Nanortaliup kujataani Itilliaruup, kiisalu tapiliuteqqillugu Nyboes kanalip (60:53'24,53N /47:57'25,36V) ikerasaliap itisilerlugulu silinnerusunngortinneqarnissaa.

Matumuuna qalleqqissaqqillugu nunatta kujataani imaatigut angallanneq ukiup ilarujussua sikorsuarnit akornusersorneqartarpoq aqqutiginiaruminaassitinneqarlunilu, aammalu ajuusaarnaqisumik inuit inuunerannik naleqartumik imaatigut ajutoortoqartarpoq, Qaqortup Nanortaliullu akornanni umiatsiamik angalaartut nunap iluatigut aqqutissaqaratik avataasortariaqartarmata taamatuttaaq Nanortaliup nunaqafittaasalu kujasinnerusumiittut akornanni imaatigut angallannermi periarfissalunnerup kingunerisaanik avataasiortoqartariaqartarmat.

Isumaqarlunnarpugut Nunatta Kujataani imaatigut angallannermut iluaqutaassasoq akimmiffiit ilai piiarneqarsinnaappata taamaaliornikkullu kangerluit atanilerneqarnissaat siunnerfilimmik sulissutigineqarpata.

Siunnersuummi matumani aamma piukkunnarpoq misissuinermi aammalu kingusinnerusukkut tassunga killittoqassappat suliniummi inuusuttut peqataatinneqarnissaat.

Taamatut ATASSUT-miit oqaaseqarluta siunnersuut manna taperserluinnarlugu ataatsimiitalimut susassaqtunut peqqissaartumik suliarineqarnissaa kissaatigaarput.

Qujanaq.